

欽定勦平粵匪方略卷一百四十二 乙卯年

十二月初一日

庚寅

托明阿陳金綬雷以

查賊踞瓜州沿江列壘踞險負嶠日久未能攻  
克者由於港汊紛歧進勦本難兼之駐營過遠  
往返路遙逆賊以逸待勞隨時乘空竄擾非移  
營進逼則攻勦難於施力琦善相地築牆西自  
儀徵新城東至施家橋而止原以防賊匪之闖

入而南距賊巢尙有二十餘里東西處處可通  
其間均係稻田溝渠迴環村落相望旣無移營  
之地又無清野之方若非建築土圍移營進逼  
別無勝算可操 臣等曉諭居民令富者出貲貧  
者效力並派遊擊滿祿已革揚州府知府張廷  
瑞等會同地方官剴切勸導卽沿西岸自八里  
鋪直達土橋舊牆池南築至江口東岸自八里

鋪直達新橋舊鑿池南築至江口合計四十七  
八里賊雖屢次出撲均被勦敗歸巢現已一律  
告竣臣等由秦家橋桂花莊移紮八里鋪東西  
兩岸之朱莊蕭莊等處其餘兩岸兵勇亦皆分  
段先後移進共營盤二十餘座建築礮臺二十  
餘座扼守長圍鉦鼓相聞聲勢聯絡留門十座  
以便進剿晝攻夜擾使不得安賊氣頓挫而我

兵不疲復於運河八里鋪之北添設浮橋二道俾東西兩岸彼此易於接應自經此番布置三汊河迤南一帶民多移回耕作如常羣情安堵該逆於十月十九等日衝突虹橋經兩岸官兵合力擊退目下野無所掠已成坐困之勢臣等料該逆必由江面竄突疊飭上下游水師嚴密防範果有箝船連日紛紛駛上經總兵陳國泰



督帶紅單船痛加勦洗大獲勝仗是長圍因偏  
已有效驗因多寫告示射過賊濠解散脅從冀  
其心離勢渙卽當乘其飢疲合力攻拔所有勸  
捐督工各紳董員并應請

恩准臣等分別保奏量予甄敘奏入

上諭內閣曰逆賊占踞瓜州屢圖竄撲托明阿等派員  
勸諭居民建築長圍現在工程告竣官兵移營進逼

賊勢窮蹙所有捐貲出力之紳董員弁著托明阿等  
分別保奏

托明阿陳金綬雷以誠又奏言黑龍江副都統  
富呢雅剛阿前月因西面土圍工竣經臣托明  
阿派令帶領馬隊移紮五仙橋分段扼堵晝夜  
親督巡防不料積勞成疾兼感窪地溼潮醫治  
無效於十一月初十日因病出缺查該員此次

揚州隨勦已歷三年頗著勞績茲在軍營病故殊堪憫惻可否

飭部從優議卹奏入

上從之

托明阿陳金綬雷以誠又奏言查江面全賴艇師堵勦焦山戰艇節經調赴上游亟須添造以資截擊茲據局員呈報自八月十六日開廠起

督飭興工做造洋船象鼻桅戰艇一隻可配大  
小礮二十九位大頭猛廣艇四隻每船可配大  
小礮二十五位快蟹廣艇六隻每船可配大小  
礮二十一位龍舩快艇二隻每船可配大小礮  
十五位總共造成大小戰艇十三隻又隨船小  
三板十三隻均係做照外海船式於十月二十  
六日一律完工惟新造各艇配用大小礮位自

一千五百斤起至二三百斤止爲數甚多開鑪  
興造恐稽時日現在各路軍營多有向洋船購  
用洋礮者業經 臣等委員前赴上海一帶向商  
船購辦飭卽由海道運歸水師以期早資攻剿  
肅清江面所有各捐生應得獎敘容俟礮位配  
齊由 臣等分別請獎局廠委員設法籌捐尙屬  
奮勉可否容 臣等一併開單酌保奏入



上從之

托明阿陳金綬雷以誠又奏言臣等查捐築之  
土圍雖缺濱江一面而上游之土橋與下游之  
焦山皆與東西兩岸土圍緊相連屬是長圍清  
野巨艇橫江水陸兩軍正可互資援應臣托明  
阿復慮該逆沿江上竄勾結金陵賊黨又於土  
橋池南挑濬寬河一道直達於江以防偷越十

一月十四日有瓜鎮賊箠二座護以大小賊船數十隻由瓜州江面溯流而上直撲土橋意在誘我下追乘隙上竄總兵陳國泰飭令各船扼住要津度礮力可及陡然起碇迎擊焚燬賊船十餘隻殲賊百餘名賊箠中礮遁回匿不復出十六日賊匪箠船蠡擁而上我師開礮擊沈賊划二隻賊匪大驚折退仍靠江岸十七日乘風

進駛以二巨箠居前復有大小賊船百餘隻隨  
其後甫近土橋忽沿北岸落帆並有衆賊登岸  
佯爲築造礮臺當經總兵松齡等於沿牆各礮  
臺連開大礮轟擊並出隊堵勦臣托明阿飛飭  
陳國泰相機圍攻該逆將箠船全力進駛圖衝  
水營陳國泰令紅單各船分兩翼下壓礮如雨  
下立沈賊船二十餘隻斃賊無數該逆前箠正

竄江心猝被紅單斜衝而來適撞賊箠我兵用火包俯擲賊箠登時延燒該逆紛紛投水隨後最大一箠被紅單各船追及兵勇跳躍過箠揮刀奮斫斃賊甚多生擒僞參護鄭金桂等多名是日北岸陸路賊匪約有數百名由江灘直趨土橋總兵松齡等出土圍柵門分路截剿殺賊過半追至軍橋餘賊多擠溺橋下盡毀其沿路

卡柵臣等東西出隊環攻瓜巢以分賊勢復據水師總兵陳世忠稟報十六日望見金陵城外沙塵蔽空下關賊船數十號連檣下駛探知金陵首逆派賊萬餘水陸並下救援瓜鎮陸路之賊已經向榮分兵追擊並有吉爾杭阿豫撥鎮江兵勇迎勦該鎮卽專截水路下竄賊船先以兵勇小船駛入內河另以大號艇船阻截江口



各兵勇行至燕子磯恰遇賊船當卽開礮並用  
各項火器對準拋放礮賊焚船不計其數追至  
觀音門賊已進口用木錐橫阻祇見陸路賊一  
千餘名沿岸撲來船內餘賊亦皆登岸陳世忠  
等撥兵上岸與豫伏兵勇及六合水勇奮力夾  
勦賊且戰且逃各兵勇追入山谷沿路賊屍枕  
藉當因山深路僻賊易潛藏復分兵勇各路窮

搜果有餘匪數百名伏於烏龍山嶺時已昏黑  
兵勇嚴守山腰至十七日黎明奮勇登山該逆  
先用亂石拋擊旋以槍械接戰我兵勇短兵直  
前賊紛紛中傷墜崖墮澗者無算查瓜州逆匪  
受此大創已足以褫逆魄惟奸謀叵測仍不敢  
以屢獲全勝稍弛周防奏入報

初二日辛卯向榮吉爾杭阿奏言鎮江逆匪自連

次痛勦後勢漸窮蹙有由陸路南竄丹陽水路  
占踞焦山東竄江陰之謠臣吉爾杭阿查該逆  
南竄丹陽之路必由東南北三門而出其東北  
二門自沿江迤邐築牆至京峴山有余萬清紮  
營堵剿無虞竄逸惟南門外地大兵單虎頭山  
尤當衝要因飭已革鹽知事張翊國紮營虎頭

山下充當頭敵一面商之余萬清將潮勇移紮  
都天廟並飭副都統致祥等將前駐茶亭之四  
營移近駐紮與東西各路營盤聯絡十月二十  
六日該逆由南門衝突而出一經我兵出隊迎  
勦卽潛身頽垣敗壁中施放槍礮我兵不能進  
攻是夜密商虎嵩林等帶領兵夫將該處垣壁  
拆毀二十七日該逆復由南門而出我兵奮勇

直前該逆卽退回城於虎頭山迤東之羊角山  
修築礮臺對新紮各營開礮轟擊二十八日余  
萬清帶領隊伍運礮數尊排列於都天廟前向  
羊角山橫擊 臣吉爾杭阿督同知府劉存厚等  
帶隊至摩旗山開礮向羊角山斜擊虎嵩林等  
由正面攻搶羊角山擊至申刻摩旗山開放大  
礮擊斃多賊城上人聲慌亂羊角山之賊亦漸



不能支持遊擊姚麟將賊築礮臺全行平毀余  
萬清所派隊伍亦將其護礮土硬犁平是役鏖  
戰至六時之久擊斃逆匪約有千人十一月初  
一日江北賊船聯檣而來蟻聚南門城外我兵  
嚴陣以待至申刻始行散去遂將虎頭山營盤  
趕緊興築完整飭令張翊國等移紮山巔該逆  
在城牆施放大礮俱越我虎頭山營盤而過其

擡礮鳥槍及我營礮而止該逆已技無所施初五日衆逆沿江而上臣吉爾杭阿當飭遊擊李若珠等迎擊一面商令虎嵩林等尾抄其後該逆行至九擺渡地方見我兵前後追襲由濱江沙灘狂奔而遁臣吉爾杭阿知該逆南竄之路已絕必將西竄金陵因函商托明阿在陳國秦所帶紅單船內抽撥五隻移紮南岸高資港口

與高資營盤互相聯絡十二月十五日會同虎  
嵩林等前赴永固等洲將洲上樹木砍伐賊由  
金雞巔一帶出巢 臣吉爾杭阿派參將周兆熊  
等分路夾擊斃賊不計其數該逆因陸路無從  
竄逸勢不能不占踞焦山東竄江陰 臣等當會  
同前撫 臣許乃釗及余萬清等前赴焦山查看  
形勢函商托明阿等於南北兩岸兵勇內抽撥

二百名紮營焦山安設礮位與艇師各營盤互相犄角十四十五等日該逆用木紮筏兩架上築礮城輔以江船數十號乘風上竄臣吉爾杭阿登高瞭望目擊陳國泰排列水陣擧獲木筏一架焚燬一架並獲江船多隻十六日金陵逆匪數千分作兩股由棲霞一帶直竄而下援應鎮逆臣向榮一面調派總兵德安張國樑分投

追勦 臣 吉爾杭阿亦飛商余萬清等派兵馳赴  
高資而兩股逆匪已爲德安張國樑等勦洗殆  
盡十九日金陵逆黨由觀音門一帶來援鎮江  
臣 吉爾杭阿仍飭虎嵩林等馳赴龍潭迎勦並  
杜其旁竄句容之路旋接探報此股逆匪亦經  
張國樑等擊敗回巢旋聞鎮城逆衆於南門池  
西修築木架礮臺 臣 吉爾杭阿會同余萬清親



赴摩旗山將大礮對準燃放轟倒賊築礮臺該  
逆由東北二門出賊數百人直撲王家灣欲燒  
民屋經我兵奮擊傷賊數名該逆恃衆抗拒參  
將台斐音等憑牆施放大礮擊入賊隊一面由  
江邊抄襲逆勢不支敗竄回城臣等竊思該逆  
於數日之間水陸並竄金陵之逆又分隊下援  
其窮蹙情形已可概見現在水陸大獲勝仗逆

贍更寒而我兵南北合圍水陸並堵可期聚而殲之奏入報

初五日甲午載增富森奏言接據各營稟報賊在

武漢分股由大江襄河而上意圖竄擾荊州經王國才等追至金口蔡店將上竄之匪極力痛勦賊衆敗退並聞官文胡林翼及羅澤南等均

移營進偏武漢是賊勢漸見窮蹙惟沔陽及監利潛江一帶外江內湖港汊分歧直通下游均爲荊州門戶誠恐賊情譎詐仍分股暗趨別徑伺隙分竄是沔監潛各處轉覺空虛不得不格外嚴防查前調四川兵勇二千名係奉

旨專爲防守荊州十一月二十日先抵荆一千五百名現經官文調赴大營會勦情形較急未便截留

但中路下游之師實屬太少合無仰懇

天恩飭令官文酌撥兵勇駐紮中路要隘以資防剿奏

八

上命軍機大臣傳諭官文曰襄河上竄之賊雖經王國才等擊退而沔陽及監利潛江一帶湖港分歧恐賊情譎詐以大股牽掣我軍分股暗趨潛沔各路前次所調四川兵勇本爲防守荊州旣經官文調赴大營

會勦則此時中路空虛自應撥兵援應著官文體察情形如大營兵勇有可分撥卽飭赴中路駐紮各要隘以固荊州門戶一面仍知照載增等嚴密防範毋稍疏虞

初六日乙未向榮奏言金陵踞匪雖疊受創懲而

時萌援應鎮江內犯蘇常之意節經添兵嚴防連日探有湖北竄回之賊五六千人合併城中



死黨嘯聚觀音門七里洲一帶十一月十五日  
據探該逆分作數路聲言夜間大夥齊出一走  
姚坊門至仙鶴門內犯兩股由觀音門直趨棲  
霞東陽一帶竄援鎮江分黨由太平朝陽洪武  
三門出撲牽綴我兵又有賊船二百餘隻由七  
里洲出江下竄當經挑派兩粵四川各兵勇及  
黑龍江吉林馬隊交總兵德安張國樑統帶馳

赴仙鶴門迎勦次日守備李日昇等與賊接仗  
適德安張國樑大軍從後路兜至逆衆大敗回  
奔又經黑龍江馬隊圍勦斬馘一千數百名餘  
賊沿江敗走我軍奮勇追擊該逆撲水淹溺者  
又七八百人生擒二百三十餘名此股賊匪幾  
無遺類而前竄之賊約有三千餘人一股已至  
東陽一股尙在棲霞街臣飛令張國樑繞過東









悍賊數百來援秦如虎揮令董洪昇等迎戰將  
悍賊併力擊刺斃賊不計其數餘匪狂逸江邊  
我軍盡力追逐該逆撲江淹溺閒有鳧水得脫  
者均奔入儀鳳門水營連環開放大礮我軍阻  
水難進將一帶賊巢焚燬淨盡統計斃賊共三  
千餘名二十三日首逆韋昌輝聚黨數千竄至  
觀音門一帶臣仍令張國樑秦如虎分統官兵

連夜馳往仙鶴門於二十四日分路進剿該逆  
卽行遁回張國樑等會兵追過觀音門焚燬賊  
卡數處因思北路當內犯之衝乃江鎮往來要  
隘該逆連出窺竄我兵漏夜馳截並檄鎮營兵  
勇節次往來未免疲於奔命因與吉爾杭阿函  
商必須屯兵北路委令副將王浚前往履勘查  
東陽鎮最爲扼要由江鎮抽勇二千名交德安

帶赴該處紮營四座相機戰守既以逼金陵賊  
出並可斷賊送歸途一俟兵力稍充再步步由  
城北移營進逼以爲合圍克復之計

向榮又奏言蕪湖逆匪盤踞神山意圖內犯十  
一月十五日一戰擊退神山之賊十八日范羅  
山石壘之賊忽出弋磯江邊窺伺陸軍追近賊  
壘外濠逆衆復回抗拒千總黃繡帶勇撲入斃

賊五六十名不防賊於迎面猝至刺中心坎登時陣亡二十三等日旗羅陶陽鋪等處賊匪全股齊出疊犯神山並旁擾龍村陡門丁橋一帶直撲我營其范羅山之賊亦衝突常山弋磯牽綴我軍連日鏖戰各兵勇踴躍用命擊斬賊匪一千數百名其紅單拖罾等船節次在江中乘風攻勦並經吳全美率同各水勇快蟹划船

晝夜巡堵江面屢次截獲偷渡賊划殺斃多賊  
據鄧紹良呈稱太平金柱關又到賊黨分股至  
查家灣焚劫嘯聚擄掠船隻聲言欲犯黃池該  
處當內竄要衝直接高淳東壩現在東陽旣須  
堵紮秣陵關亦無兵可抽 臣惟有揀派精銳一  
軍以備緩急如果黃池有警卽令總兵明安泰  
統帶馳援由高淳一帶攔勦一面密飭鄧紹良



妥防後路不可稍有疏虞其蕪湖內外之賊出沒靡常與江北賊勢蔓延如能先將江面扼斷使該逆不能接濟自可以次蕩平所有前籌關門洲攔紮木筏已飭催鄧紹良等趕緊妥辦並令與吳全美力圖扼剿一面設法進攻毋再遷延奏入

上命軍機大臣傳諭向榮怡良吉爾杭阿曰金陵賊匪

窺伺蘇常已非一日向榮以東陽鎮最爲扼要飭德安帶兵前往紮營堵遏足斷逆賊北面往來之路據鄧紹良探報太平金柱關匪黨欲犯黃池則高瀆東壩一帶均關緊要著向榮與吉爾杭阿確探賊蹤撥兵應援一面飭德安明安秦等相機攔勦毋令內犯至該逆窺伺腹地必先分布奸細潛往勾結怡良駐紮常州著嚴飭地方文武員弁於丹陽高瀆無錫一

帶嚴拏奸細以消內患設有警信並著怡良就近撥  
兵策應毋稍疏懈

上諭內閣曰此次金陵賊匪大股麕至蕪湖賊出窺伺

均經向榮督派將弁進擊大獲勝仗所有在事出力  
員弁卽著擇尤保奏陣亡千總黃繡著交部從優議  
卹

初七日丙申和春福濟奏言廬州爲北路第一門

戶防守最關緊要焦湖路達金陵距廬城僅四  
十里雖於丙子鋪紮營堵禦而湖面遼闊處處  
皆通朝發可以夕至此時防禦要隘巡守城垣  
兵本無多逆匪萬一來窺所關甚鉅昨據六安  
州知州茅念劬稟報盤獲奸細據供安慶賊匪  
探聞廬郡兵少有由桐城襲廬之說逆情詭譎  
不可不防臣等就近督勦三河尖以定人心官

軍祇有此數不得不先其所急擬俟三河尖勦  
匪淨盡卽行進攻廬巢無爲桐城一面進圖安  
慶以清江北奏入報

同日陸元烺奏言十月十六日臬司周玉衡帶  
勇行至廬陵安福交界之里田地方會同阿隆  
阿等分隊前進安福城內逆匪見大兵將至先



行竄出北門埋伏白華山下阿隆阿等督令後  
隊士卒裏外夾擊殲賊一百餘名敗匪均望分  
宜奔竄當將縣城收復該逆竄至分宜縣車谷  
地方知縣汪正準率勇堵禦詎該逆繞由小路  
撲入縣城汪正準援救無及卽就鄉間添募壯  
勇於二十日率領進剿適安福袁州援兵四集  
該逆卽由陽橋一帶向萬載逃逸汪正準隨同

阿隆阿等收復城池先是署萬載縣知縣李吉  
言探聞賊擾分宜卽派勇前赴塘下地方守禦  
嗣聞義甯另股逆匪窺擾新昌李吉言卽率勇  
赴盧家洲防堵二十三日分宜之賊從陽橋直  
撲塘下兵勇被衝潰散致賊越入城內李吉言  
由盧家洲折回與張朝縉等收集潰兵共圍克  
復阿隆阿周玉衡亦派兵勇馳赴萬載十一月

初一日在寨下地方鏖戰斃匪三百餘名追殺  
數十名該逆來撲五次均爲我軍擊退是夜焚  
燒衙署民房悉向新昌逃遁李吉言隨即折回  
收復其湖北大股逆匪在渣津地方與義甯防  
兵打仗後竄至新昌縣天寶鄉知縣莊丙熊探  
知賊擾縣境遄回防堵而該匪乘虛撲入新昌  
縣城萬載敗賊亦至新昌合爲一起有從上高

棠浦兩路窺犯瑞州及臨江樟樹之謠瑞臨二  
郡甚爲喫重臣現飭周玉衡就近馳往臨江瑞  
州二府確探賊蹤所向迎頭兜剿並同各路兵  
勇相機夾擊總兵阿隆阿前於楓田剿賊失利  
經臣奏請交部議處並將參將柏英摘去頂翎  
今該鎮將會同周玉衡督率兵勇收復安福等  
縣均屬出力前請議處摘去頂翎之案懇

恩開復安福縣知縣杜林隨同收復城池功過尙足相  
抵應免置議署分宜縣知縣汪正準署萬載縣  
知縣李吉言被賊越入城內雖卽收復究屬防  
範不力署新昌縣知縣莊丙熊被賊竄撲入城  
雖先期公出究屬未能豫防俱屬咎有應得相  
應請

旨將汪正準李吉言莊丙熊一併革職責令與杜林分



別趕辦善後並隨同攻勦縣丞張育楠千總胡  
殿魁外委王逢亮樂捷元受傷陣亡應請

飭部從優議卹奏入

上諭內閣曰陸元焄奏官兵收復安福等縣情形湖北  
崇通逆匪竄踞安福總兵阿隆阿等督兵收復該匪  
敗竄分宜阿隆阿等援兵進剿賊匪竄陷萬載卽將  
分宜縣城收復復經官兵馳赴萬載擊斃賊匪多名



收復縣城該逆退踞新昌現在派兵迎剿贛州鎮總兵阿隆阿吉安營參將柏英援剿出力所有前案議處及摘去翎頂之處均著准其開復已革安福縣知縣杜林隨同收復縣城功過尙足相抵著免其置議署分宜縣知縣汪正準署萬載縣知縣李吉言於縣城被陷後雖卽收復究屬防範不力著與因公出境之署新昌縣知縣莊丙熊一併革職與杜林分別趕

辨善後並隨同攻勦縣丞張育楠千總胡殿魁外委  
王逢亮樂捷元奮勇殺賊受傷陣亡均著交部從優

議卹

欽定勦平粵匪方略卷一百四十三

乙卯年

十二月初九日

戊戌

陸元烺奏言查瑞州

久坍塌無險可憑知府王嘉麟會同都司唐應魁及帶領平江勇之知縣劉希洛李錕於離城二里許之高岡分紮三營合力扼守署高安縣知縣吳攸之在城巡防十一月初九日探知新昌大股逆匪已至棠浦村前一帶王嘉麟卽飭

各營嚴行準備賊匪四五千分三路來撲勢甚猖獗劉希洛等俟賊撲近傳令出隊李銀派勇由左路抄出劉希洛派勇由右路抄出又合派六哨由中路迎勦王嘉麟唐應魁率兵爲後路策應殺賊五百餘名生擒八十餘名逆衆大敗狂竄追至望城岡又殲斃無數十一日賊匪分路撲營劉希洛李銀督勇迎擊匪黨兇悍異

常王嘉麟唐應魁馳往策應血戰五時斃賊千餘人奈彼眾我寡兵勇死傷枕藉劉希洛李銀力竭被害王嘉麟唐應魁亦各身受數傷被匪重重圍裏吳攸之與額外吳松齡前往救援始得突圍而出詎逆匪已分股由北門擁入城內兵勇均被衝散現在收拾潰兵添募鄉勇力圖克復又聞新昌逆匪由上高界埠陰岡嶺攻撲

臨江防隘兵勇失利被匪闖入城內文武各員  
不知下落並聞兩路逆匪意圖直犯省城臬司  
周玉衡於收復萬載後探知新昌之賊將犯瑞  
臨二郡湖南鄱縣之賊已竄入吉安府永甯縣  
分撥練勇取道宜春分宜援救瑞州等處親帶  
兵勇馳往吉安進剿永甯臣查臨江與撫州吉  
安連界瑞州又壤接奉新靖安省南一帶均爲



震動該逆或徑犯省城或旁窺鄰郡俱屬堪虞  
現飛飭周玉衡督率兵勇趕緊折回臨江並飛  
催道員耆齡帶領駐防饒郡額勇一千七百名  
知府周汝筠添募南康勇二千名馳往堯勦一  
面咨商曾國藩酌撥勁旅協助惟江省界連皖  
楚粵東三面受敵沿邊要隘處處須防額兵本  
屬無多省城及各郡所募練勇合計雖有萬餘

一經分派防勦仍覺其少此時兩湖大股逆匪  
盤踞腹地尤有防不勝防之勢省垣守兵僅二  
千有奇不敷分布合無仰懇

天恩飭下湖南撫臣選派得力兵勇二千名派員管帶

星馳來江助勦署瑞州府知府王嘉麟署高安  
縣知縣吳攸之護理瑞州營都司唐應魁堵禦  
不力請

旨一併革職帶罪圖功臬司周玉衡僅派備弁往援輕  
重失當臣未能先事豫防均咎有應得請將臣  
及該臬司交部議處候補知縣劉希洛李銀血  
戰多時力竭陣亡應請

飭部從優議卹

陸元烺又奏言候補知府劉長佑前在江省剿  
匪甚資其力雖此時南省郴桂軍務尙未蕺事

而江楚輔車相依江省之賊一日不除楚南之防一日不容稍懈應請

飭下湖南撫臣卽派劉長佑統帶兵勇來江以期綏靖

腹地

同日江西學政廉兆綸奏言江省自軍興以來守備單弱俱借資於募勇聞通省募勇約有一萬五六千名若使人人用命已不爲少乃或稱

某軍或稱某勇數其名目竟有二三十項之多至帶勇之員惟聞新升贛南道耆齡統帶二千餘名駐紮饒州其餘或數百人爲一隊或百餘人爲一隊管帶者多係微末之員彼此不相統屬每遇地方有警則稟由撫臣酌撥數隊前往先到者每以後隊未集爲辭後來者又觀望前隊之利鈍往往遲留不進幸俱進矣而意見各

殊勝則互訐以競其功敗則爭潰而不相救甚且擾民冒餉乘便營私種種弊端不勝枚舉前年八月省城解圍祇九江一郡喫重經曾國藩等提兵勦辦江省北面無虞所有此項募勇不過彈壓土匪藉壯聲威而已義甯被擾以來賴羅澤南一軍督兵克復及該道提軍入楚逆匪又乘隙竄撲鎮臣劉開泰陣亡遂陷新昌其自



湖南竄踞永新之匪復與合夥賊勢日張本月  
初十十一等日又聞分踞瑞州臨江兩郡距省  
城不過二二百里中間並無阻隔設有倉卒以  
此散而無紀者當之何恃不恐 臣愚就現在情  
形而論惟有請

旨飭下撫 臣速將所募之勇裁去一切名號併爲三四  
軍每軍可得四五千由撫 臣妥派監司大員

素有望望者三四人各統一軍其軍中分領之  
員弁以及戰守攻取之宜卽由派出之大員相  
機辦理而撫臣居中統制以責其成功如此則  
後效或可幾而前弊亦可去也 臣聞省垣兵勇  
現祇二千餘名守禦已形單弱而江省武弁急  
切又無可用之材卽上年所請棟發來江者亦  
均未經戰陣難資統帶此時所恃者惟勇設復

因循散漫爲之奈何署撫 臣陸元烺辦事非不  
勤懇而省垣兵力旣單帶勇者又不可靠其視  
署任未必無五日京兆之見似須實任者早到  
方可事權歸一聞新任巡撫由陝西山西迂道  
迎摺北上尙無到任確期相應請

旨飭令兼程速赴新任以專責成均奏入

上命軍機大臣傳諭曾國藩文俊陸元烺曰江西臨江

瑞州距省城僅一二百里均係一水可達此時省城防兵僅二千餘名緩急萬不可恃曾國藩近在九江所帶水陸兵勇爲數不少著卽迅撥兵勇馳往瑞州臨江二處與本省兵勇合力勦截以遏賊鋒並著會同該撫等分兵嚴扼要路保護省垣毋稍疏懈前諭令將黃贊湯所帶練勇四千名分撥布置原恐湖南湖北逆匪合而爲一擾及袁臨今旣已合股內竄著

陸元烺卽將該侍郎所帶練勇派委文武幹員統帶前進與周玉衡周汝筠等合力攻勦加以耆齡所帶兵勇與曾國藩所撥兵勇前後夾擊庶不至擾及省垣萬不可專待湖南之兵致滋貽誤本日復據廉兆綸奏江西募勇約有一萬五六千而名目繁多竟有百餘人爲一隊者似此散而無紀遇敵何能制勝該學政所請裁去一切名號併爲三四軍每軍可得四



五千入派素有威望大員各統一軍責成勦賊較爲得力著陸元烺酌量歸併派員管帶此時南昌省城偏近賊氛一切守禦事宜甚爲喫重新任巡撫文俊現抵何處著卽迅速赴任與曾國藩妥籌勦辦毋再耽延文俊自楚省赴江紆回繞道名爲迎摺實則故意耽延勿謂朕見聞莫及也

上又命軍機大臣傳諭駱秉章曰湖北崇通賊匪並湖



南茶陵州之賊竄入江西義甯萬載等州縣後股竄  
踞新昌遂撲瑞州由北門擁入其分股逆匪復攻陷  
臨江該省兩府城池先後失守賊氛逼近省垣人情  
震動湖南壤地相接應援較近著駱秉章選派精勁  
兵勇二千名卽日前往江西助剿候補知府劉長佑  
前經該撫奏留湖南並令帶勇與王葆生等會剿鄱  
縣賊匪此時江西情形緊急著駱秉章卽將所派兵

勇交劉長佑統帶剋日赴江協力攻勦儘劉長佑不能前往卽著駱秉章另派得力員弁統兵前進其應備器械鉛藥口糧等項均著妥爲籌備俾得迅速成行不致遲延貽誤

上諭內閣曰此次兩湖逆匪分竄江西腹地意圖窺伺省城著曾國藩陸元烺迅卽添兵募勇速圖克復毋令盤踞鴟張署瑞州府知府王嘉麟署高安縣知縣

吳攸之護理瑞州營都司唐應魁雖經力戰受傷究屬堵禦不力著一併革職帶罪圖功按察使周玉衡帶兵赴剿未能趕緊應援陸元烺不能先事豫防均屬咎有應得著一併交部議處候補知縣劉希洛李錕力竭陣亡殊堪憫惻均著交部從優議卹至臨江如何被擾情形及該文武員弁下落著陸元烺查明具奏

初十日巳亥官文楊載福胡林翼奏言十一月二

十八日道員羅澤南率湘勇各營紮洪山南岡  
修築營盤賊衆聚蛇山觀望不敢出戰臣胡林  
翼於紙坊拔營進駐李家橋逼近省城之南十  
字街口八步街口壘匪約共二萬餘人從十字  
街而上以阻我師勢甚兇悍候補參將普承堯  
等分路迎敵斃其前鋒數十人賊敗退復戰各

營復奮力禦之如是者三四次相持至二時之  
久羅澤南李續賓登洪山瞭望卽派直隸州知  
州蔣益澧駐守老營防壇角之賊並分右營三  
哨據洪山以制東門外礮臺之賊羅澤南等親  
率兵勇至賽湖隄邊直攻附城大壘及十字街  
口之壘普承堯唐訓方等暗令諸勇佯敗反旗  
而走賊不知我師業已抄出諸勇縱火焚燒壘



中之賊無得脫者其追我師之賊從隄下藕塘以竄陷於泥淖有一勇殺至數十賊者餘賊俱由十字街以遁附城大壘之賊見我師分支由賽湖隄上進攻遽合二小壘之賊來禦我師以擡槍轟之馬俱倒斃賊大敗歸壘我師尾之賊皆縋城而上其不及縋者盡爲我師所殺二小壘亦一時並踣縱火焚燒與十字街口賊壘之



火同燭霄漢 臣六營之勇追賊至十字街羅澤  
南等之攻附城賊壘者因由城根橫入首尾交  
擊屍橫滿街乘勝至望山門外鮎魚套口而止  
及壇角之賊繞洪山而東漢陽之賊渡大江而  
南諸壘灰燼已無濟矣是役也兩路連破四壘  
殺斃焚斃約三千人生擒二百餘人道員羅澤  
南李續賓參將普承堯首先衝鋒知府銜唐訓

方率各營繼之將士均極奮勇容 臣查明彙案  
請保現在 臣官文已飭各路速攻漢陽並另派  
兵勇前往石嘴金口協勦以助聲威 臣胡林翼  
與羅澤南速攻武昌水師則南北兩岸上下衝  
擊總期迅復堅城以慰

聖廬奏入

上諭內閣曰此次道員羅澤南等帶兵進攻武昌踢破

賊壘大獲勝仗勦辦甚爲得手所有出力將士准該督撫等查明彙案保奏仍著會合南北兩岸水陸各軍乘勝迅圖克復武漢兩城掃蕩逆氛以慰朕望

同日駱秉章奏言永州一路近年防勦均得候選道王鑫及周雲耀之力王鑫一軍於逆賊胡有祿一股勦滅後臣卽調由耒陽進勦郴桂賊匪永州所恃僅周雲耀一軍未可令其越境進

勦且廣西羣盜如毛周雲耀孤軍深入尤慮有  
失當令全師速歸以期妥慎十月二十七日周  
雲耀率師駐道州之蔣家嶺偵知逆匪朱洪英  
將由灌陽竄攻永明知縣曾德麟飛函告急周  
雲耀卽星夜赴援十一月初一日馳抵永明縣  
初二日逆衆攻撲城垣周雲耀督勇出城迎擊  
斃賊三百餘名登陴固守礮轟城外賊匪屍如

山積初四日賊用火藥轟開西門周雲耀猶手  
刃緣梯上城之賊三名既知事無可爲自刎而  
死把總周佑得手刃數賊相繼陣亡此廣西賊  
合股竄撲永明縣城副將周雲耀城陷殉節之  
實在情形也桂陽州城克復後王盡移師赴郴  
攻剿未至之先郴城賊分股三四千仍思襲攻  
桂陽州城爲牽製官軍之計十月十七日由村



頭沙坪蠡擁而來直撲州城該署知州梅震榮等率勇夾擊斃賊九百餘名該逆敗竄嘉禾又由該縣分股一竄新田常甯兩縣交界地方已經勦散一竄甯遠縣下灌墟一帶人數不過千餘十一月初二日派令參將趙永年馳抵甯遠分路進攻下灌墟因大霧迷漫咫尺莫辨兵勇行抵墟口忽兩山伏賊抄出官軍之後勢不能



支趙永年督兵左右衝突力竭陣亡千總唐仁  
高等相繼陣亡此桂陽州擊敗逸賊竄踞甯遠  
縣境趙永年勦賊陣亡之實在情形也現雖疊  
據王鑫及知府劉長佑等稟報接仗獲勝將賊  
困偏可望聚殲然賊數尙有萬餘負嵎死守恐  
未能剋期蕺事 臣已密飭王鑫等如郴州可期  
速拔固可移師西向儻克復需時亦當分撥一

軍赴永以期兼顧此次保升副將周雲耀誓守危城捐軀殉難大節懷然請

飭部照副將例從優議卹參將趙永年等均請照例議

卹文生胡化宣請照從九品例六品軍功傅周年請照外委例議卹其失守城池之代理永明縣知縣曾德麟應請革職拏問外委楊尙虹陳學校在周雲耀營中帶勇於開城擊賊時卽避

往上江墟並未歸隊現密札道州知州馮崑就  
近查明押解來省據實彙辦奏入

上諭內閣曰廣西永福賊匪由灌陽竄攻永明副將周  
雲耀聞警赴援馳抵永明督勇出城迎剿斃賊三百  
餘名礮轟城外賊匪屍如山積郴州賊匪由村頭沙  
坪一帶攻撲桂陽州城經署知州梅震榮等率勇擊  
退該匪現竄甯遠縣之下灌墟著卽督飭道員王金

等迅速進勦淨掃逆氛周雲耀力戰捐軀深堪憫惻  
著照副將例從優議卹臨武營參將趙永年著與陣  
亡之把總朱耀唐仁高周佑得均交部照例議卹文  
生胡化宣著照從九品例議卹六品軍功傅周年著  
照外委例議卹代理永明縣知縣曾德麟於賊匪竄  
至縣城時藉詞募勇馳赴道州以致縣城失守著卽  
革職拏問嚴叅懲辦外委楊尙烜陳學校於周雲耀

開城擊賊時逃避上江墟著於拏獲後訊明情節卽  
行正法以肅戎行

十一日庚子官文奏言臣前隊諸軍自攻敗漢陽

城外之賊卽在三眼橋築營九座顏朝斌孔廣  
順張萬祿石清吉四營列於前李孟羣李保邦  
二營在中何越珽盧又雄二營居後綿洵帶馬  
隊各營在後接應因與武昌之兵約期進攻武



漢臣於二十八日馳至蔡店督戰因漢陽城內之賊堅匿不出毀除城外賊卡二座轟倒龜山尾至伯牙臺土城一道約計殲斃二百餘名餘俱逃散十二月初一日臣親赴三眼橋督隊李孟羣率各營兵勇由十里鋪進攻飭礮船由河下夾擊先奪西門外頭卡賊礮連擊我兵伏地而行直至卡邊勇目張兆麟躍身先登衆勇繼



之卡內之賊措手不及俱被殺傷趕散放火焚燬隨派軍功盧又雄與知州李光榮帶勇由西門橋進攻毀其土城遊擊何越珽等帶勇由龍燈隄進攻餘營分投接應盧又雄等至龜山尾遇賊大股拒戰擊斃賊數百名李保邦等至月湖隄接戰賊勢不支急往後退追墮入水者不計其數礮船攻至五顯廟連燬賊船十餘隻破

賊水卡二座奪獲賊船四隻漢陽東西城外土  
城俱已毀盡據生擒賊供漢陽城內本有二萬  
餘賊數戰之後傷亡逃散存不及半現仍督軍  
環攻相機進取其羅澤南之軍自攻克咸甯城  
池復大敗賊於山坡驛毀其堅壘旋由金口進  
紮洪山胡林翼亦進次李家橋上月南北兩岸  
各軍約期出隊胡林翼破保安門外賊壘羅澤

南破洪山以下賊壘維時王國才在沌日出隊  
請欽都與阿等在沙口漢鎮出隊均有斬擒並  
焚燬賊船南北兩岸火光相接敗賊呼號不絕  
浮屍蔽江昨武昌城中僞丞相熊鴻恩自黃陂  
通信願投誠內應臣當送交胡林翼就近妥辦  
惟屢接胡林翼來函金口石嘴地方我軍後路  
糧道攸關無兵防守臣因銅仁糧匪徐士杰等

復陷松桃屢犯鎮筵等處將前調兵一千名內  
分撥後起兵四百名留在南省防剿其已到北  
省六百名當飭紮於石嘴地方爲羅澤南等後  
應俟川兵到時再行酌量分撥奏入

上命軍機大臣傳諭官文曰漢陽城外賊卡土城經官  
文督兵進攻悉行焚燬胡林翼羅澤南亦將武昌保  
安門外及洪山等處賊壘分投剿除南北兩路官軍

均極得手武漢賊匪不能相顧勢極窮蹙著官文乘此聲威會同胡林翼羅澤南併力攻勦節節進逼迅圖克復兩城

十二日辛丑曾國藩奏言據各路探稱此次賊犯

江西實係僞易王石達開僞豫王胡以光僞易丈黃姓僞丞相曾姓張姓率衆二、三萬人大舉內犯九月間從安慶上竄自樊口登岸取道金



牛西上九月二十五日濠頭堡之挫參將彭三元等殉難十月初五日通城之挫知縣李原濬等殉難十五日義甯之挫總兵劉開泰殉難此次瑞州之挫知縣李錕劉希洛等殉難皆係與石逆大股相遇該逆往來於湖北湖南江西三省交界之區蹂躪猖獗逆氛極惡萬載股逆自湖南茶陵而來者已與粵匪合而爲一臣查石



達開爲賊中著名驍悍之魁上年在湖口與臣  
軍水陸接仗詭計百端卒挫我師今乃大舉內  
犯又附以茶陵股匪自非厚集勁旅不足以資  
堵剿臣處陸路兵勇除羅澤南一軍業經調赴  
鄂省外惟副將周鳳山九江一軍尙爲得力臣  
接瑞臨失陷之信卽飛調周鳳山統帶全軍前  
往堵剿已自九江拔營進攻瑞安臣亦知潯防

契重不宜輕撤奈石逆大股竄踞瑞州恐其肆  
擾腹地江省難以抵禦 臣處別無重兵不得不  
先其所急暫解九江之圍移勦瑞臨之賊江省  
水師係知府劉于涓統帶八九月間隨 臣紮泊  
南康後因茶陵股匪竄至安福 臣調該知府至  
吉安防堵旋因萬載新昌先後竄陷署撫 臣陸  
元烜又調至樟樹鎮防堵今石逆大股攻陷瑞

州臣恐江西水軍過於單薄又在青山楚軍水師內抽調賀虎臣一營帶戰船三十號駛赴省河與劉于溇協同防守梭巡上游一帶毋使該逆東渡直薄省城至羅澤南一軍入楚以後克復通城崇陽大捷羊樓岡克復蒲圻戰功屢著茲石逆大股猝來江西江省官紳皆思調羅澤南回江會剿臣思湖北通城縣爲三省適中之

地與湖南之巴平湖北之崇蒲江省之義甯州相去皆在百里內外已飛飭羅澤南在通城地方駐紮俾石逆大股有所牽制顧忌不敢深入江西腹地三省有急可以兼顧如周鳳山一軍不敷勦辦再調羅澤南由義甯回江助勦以爲後勁之繼如瑞臨之賊迅就撲滅則羅澤南由通城回攻武昌亦不過二百餘里其贛南道耆

齡督同遊擊遮克敦布帶賴勇二千在饒州防  
堵聯絡紳團屏障東北深得民心署撫臣調者  
齡至吉安義甯等處防剿饒州士民來臣營兩  
次稟請該道留饒情詞懇切旋因瑞事愈急署  
撫臣飛檄飭催者齡令遮克敦布先帶賴勇一  
千馳赴省城今瑞臨並陷九江重兵已撤赴省  
城局勢大有變更則遮克敦布之兵自應仍回



饒州以嚴東北之防查江省九十月以後土匪自湖南茶陵而來粵逆自湖北通城而來西邊吉袁瑞臨四府並遭蹂躪此時惟當防守東北力保饒廣撫建四府庶錢糧有可徵之處奏報有可通之路保全半壁冀以挽回全局 臣屢次函商署撫 臣陸元烺留耆齡久駐饒州無庸調往他處近又咨商請飭遮克敦布帶額勇仍回

饒州防堵東路以免疏虞

同日廉兆綸奏言瑞臨二郡逆匪逐日遣賊四  
出擄掠臨江一股頃又進踞樟樹鎮該處旣爲  
撫建吉贛通衢且又偏近豐城距省一百餘里  
省垣兵勇無多勢難抽撥迎擊而賊烽日迫人  
情洶洶現聞曾國藩札調副將周鳳山來省接  
勦是九江陸路已開一面儻該逆跟蹤追襲不

免仍爲牽掣且聞現踞瑞州之賊係逆首石達  
開領衆萬餘中多悍賊周鳳山所帶兵勇不過  
四千餘人亦恐驟難殄除而臨江竄匪漫無制  
遏裹脅日衆必致糜爛不堪雖經署撫臣陸元  
烺飛咨湖南速調劉長佑帶兵來江並調知府  
周汝筠募勇赴援但聞劉長佑係湖南奏留之  
員其能來與否尙難豫定周汝筠本在南安此

時道途梗塞且其練勇已散重須招募省垣屢  
經札調至今尙無帶勇起程確期均恐緩不濟  
急查浙江甯紹台道羅澤南一軍聲勢甚壯近  
聞曾國藩有札調羅澤南回駐通城以爲三省  
策應之說自係爲江省急迫回援地步但刻下  
情事日異曾國藩駐紮南康不比近在省垣見  
聞更切署撫臣陸元烺亦深以羅澤南回勦爲

然伏乞

恩施速飭羅澤南回軍援勦則江西可保於大局庶有裨益均奏入

上命軍機大臣傳諭曾國藩陸元烺曰據曾國藩奏已飭副將周鳳山將九江全軍帶往瑞州復於青山水師內撥船三十號赴省河協防自係先其所急惟九江如何布置未經奏及設或周鳳山全軍赴省而潯



城逆賊潛躡其後或擾江西腹地或上竄湖北下連  
蕪湖隨在可慮曾國藩現駐南康存營兵勇共有若  
于能否嚴扼九江之衝卽著妥籌布置不可專顧一  
路羅澤南進攻武昌正在得手據胡林翼等奏卽日  
可期克復未便遽行撤回俟武漢克復後該道或徑  
趨江西或由崇通攻賊之後再當酌量催調至耆齡  
遮克敦布駐紮饒州之勇旣經調赴省城再令撤回

亦多周折惟該侍郎意在保全完善之區亦不爲無見著陸元烺通盤籌計將耆齡遮克敦布二員酌留一員在饒督同本地練勇扼要防守其現調兵勇仍飭前往瑞州以期兵勇厚集至臨江踞城之賊亦應亟籌分勦現派兵勇均係前往瑞州尙未計及臨江本日廉兆綸奏稱臨江竄匪漫無制遏裹脅日衆尤恐其互相犄角牽綴我軍况周汝筠練勇業經遣散

尙須重募劉長佑又未必能來所謂湖南兵勇亦恐驟難分撥著曾國藩陸元烺妥籌兼顧萬不可因有警信張皇失措徒使兵勇有調撥之煩轉授賊以可乘之隙也

曾國藩又奏言查十一月初五日賊衆由九江東北兩門繞城行至八里坡高嶺地方分爲六股排列嶺之東西西門亦出賊約三四百名由

楓樹灣前來復有賊由南門湖內用船登岸撲我軍西面官兵分投迎擊賊在八里坡前行經參將阿達春之勇由左繞至斃賊十數名都司滕國獻帶兵衝殺嶺東中路畢金科之勇由嶺東右路衝入各斃賊數十名嶺東賊殺齊退入東門林內抗拒我軍見城上槍礮如雨不能近偪周鳳山遂令阿達春等分往湖邊抄賊後路

賊奔至北門江邊欲乘船而逸滕國獻乘勢追  
逼賊上船不及溺斃者數十人時都司李新華  
等帶勇在嶺西各敵一股殺賊數十名其西門  
賊一股經守備岳炳榮等左右夾擊各有斬獲  
南門湖內之賊駛進甘棠湖等處總兵居隆阿  
用礮轟沈大船一隻小划二隻擊斃淹斃之賊  
十餘名賊敗駛出湖外初六日下游援賊千餘



人添集鍾山分五股來犯直抵蘇官渡北岸同  
知李元度遣守備羊瀛等三面兜剿追過五里  
橋突起伏賊二百餘人逆首黃汝金騎馬衝陣  
經蔣文煥等指認遂令各哨圍擊直取賊渠該  
逆狂竄追至三家市逆衆回匿下鍾山我軍登  
大小嶺各據山椒揮勇焚其卡房望樓七所直  
逼下鍾山石牆之下逆首黃汝金復率衆來追

彭斯舉等分路衝截往復十餘次輒有斬馘日暮收隊至三家市忽逆黨千餘人傾巢尾追李元度催兵返鬪彭斯舉等望見逆首黃汝金遂率擡槍指擊該逆被轟落馬賊衆拖曳我軍乘勢回攻立斬二百餘賊逆黨奔潰不復成軍各營仍追至三家市至水師駐紮青山九月二十七日賊船五十餘號竄至姑塘我軍列陣禦之

該逆佯向來路退敗我軍乘勢進攻賊復分船  
開向西岸槍礮連施時青山陸營亦已出隊至  
姑塘見匪船近岸用擡槍火箭轟射賊不敢近  
我船一齊駛進猛攻賊敗竄近鞵山十月二十  
八日我師前右兩營循西岸新中嚮導兩營循  
東岸均近鞵山中流灣泊該逆瞥見我軍哨船  
兩岸出隊我哨船且戰且走至鞵山賊見各船

陣勢嚴整槍礮猝發卽行敗走右前兩營由西岸追及湖口賊忽回船拒戰右營長龍船一隻因灘乾擱淺被賊圍奪退至鞵山東岸二營近前接戰萬礮齊施賊始捩舵回奔我軍又復尾追數里此次陸軍迎勦逆首受傷水師亦獲勝兩次稍摠積憤臣惟有伺隙而動以期力破賊壘陣亡兵勇查明照例辦理奏入報

同日掌山西道監察御史宗稷辰奏言自粵寇  
竄擾長江數年來武臣之能戰守者不多文臣  
之有膽略者尤少如烏蘭泰塔齊布江忠源皆  
難得之將才而多不盡其用固大可惜近如支  
持兩湖之胡林翼羅澤南皆能以膽爲士卒先  
遂時有斬獲收復此二人者實曾國藩有以開



之然至賊重竄江西會國藩徬徨於彭蠡之中  
亦甚孤矣在下者罕得如臧紆青以佐行陣在  
上者罕得如徐榮石景芬以一心力天下豈絕  
無人何以用之如此其不足乎此時若開兼資  
文武一科誠足濟當務之急而臣工多不敢言  
薦舉者一恐其才疏而得過一恐其遇蹇而罔  
功處燃眉焚頂之時守蹈常習故之轍見有挫



鬱鬱伏處田間 臣思康熙中海內外猶未盡平  
建議者主收召布衣自詞科舉而野無遺賢天  
下於是大定今誠能破格以招傑士則得一人  
可以平數州得數人可以清一路長江雖阻當  
不難分道建功剋日平之也

明詔如命廷臣與科道等各舉所知又

命督撫保之於外無論已仕未仕果能文武兼資皆許

徵起必可網羅而盡得之臣尤願既得其才必當其用實今日求羣策羣力之要務也伏惟聖主鑒其愚忱而採擇之奏入

上諭內閣曰現在用兵省分委用需人如有才兼文武膽識出衆之士自應隨時採訪或令隨營或辦團練以收實效宗稷辰所稱湖南之左宗棠浙江湖州之姚承與江蘇常州之周騰虎管晏廣西桂林之唐啟

華才略各有所長著江蘇浙江湖廣西各督撫悉心訪察如其人果有經濟之才卽著出具切實考語送部引見此外衡茅伏處不乏英奇並著各省督撫廣爲諮訪擇其素懷忠義韜略過人者據實保奏一併給咨送部引見候朕錄用總期保舉得實毋尙虛聲將此通諭知之